

## Dragi prijatelji/ce,

Predstavljamo vam **aprilsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **181** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>



### S A D Ź A J

Aktivnosti u aprilu 2016.....	2
Planovi za maj 2016. ....	6
Aktivnosti članova mreže.....	7
Saopštenja/donatori/pozivi .....	27

## AKTIVNOSTI ORC / HCA U APRILU 2016.



### Projekat „Vašar kulture“

U Banja Luci je u periodu 31.03. – 04.04. u okviru Interkulturalne akcije ALF BiH mreže, održana završna manifestacija projekta „Vašar kulture“. Pored organizatora - DIS Pozorišta mladih Banja Luka, te partnera: Udruga Enter Vitez, Proni Brčko, „Magic factory“ Tuzla, Prosvjeta Višegrad i ORC Tuzla, učešće na Festivalu „Vašar kulture“ uzelo je još 13 grupa iz 4 zemlje – „Teatar Levo“ Beograd, Srbija; Teatar „Maske“ Kostajnica, BiH; Kazalište mladih „Korifej“ Nova Bila, BiH; Teatar „Scena“ Novi Grad, BiH; Srpsko državno pozorište iz Temišvara, Rumunija; Mostarski teatar mladih 1974 Mostar, BiH; Prosvjeta Prnjavor, BiH; Murata Giovanni i Indiana teatrum Venezia, Italija; Pozorište mladih Zvornik, BiH; Gradsko kazalište mladih Vitez, BiH; kao i Biblioteka za slijepa i slabovidna lica RS Banja Luka i Akademija umjetnosti Banja Luka.

Tokom pet dana održavanja „Vašara kulture“, u prostorima Doma omladine u Banja Luci, održan je čitav niz edukativnih radionica, kulturnih tribina, revija festivalskih filmova (Tuzla Film Festival – Festival južnoslovenskog filma), izložba i promocija knjige, berza kulturne ponude, pozorišnih predstava. Više od 110 mladih ljudi, kulturnih entuzijasta iz gotovo 20 različitih grupa uzelo je učešće u ovim aktivnostima. Pored samih učesnika, projekcijama i predstavama prisustvovalo je i više od hiljadu gledalaca. Reakcije samih učesnika prikupljene još tokom održavanja Vašara kulture, govore da su svi bili veoma zadovoljni prijemom u Banja Luci i sadržajem manifestacije. Pohvale i pozitivne reakcije su se nastavile nakon završetka događaja te se na osnovu svega toga može zaključiti kako je ovo bio još jedan veoma dobro organizovan kulturni događaj u okviru ALF mreže Bosne i Hercegovine.



## ✚ Prekogranična građanska mreža za mir, pomirenje i sigurnost ljudi na Balkanu



# Claim!

CITIZEN'S NETWORK FOR PEACE, RECONCILIATION AND HUMAN SECURITY

Projekat „*Prekogranične građanske mreže za mir, pomirenje i sigurnost ljudi na Balkanu*“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Projekat je podržan od Evropske Unije.

### ► Rezultati istraživanja



Rezultati istraživanja:  
Aspekt ljudske sigurnosti mladih koji žive u „kolektivnim centrima“ ili „alternativnim smještajima“ u BiH

ORC Tuzla, December 2015

Tokom aprila objavili smo rezultate istraživanja: Aspekt ljudske sigurnosti mladih koji žive u „kolektivnim centrima“ ili „alternativnim smještajima“ u BiH. Rezultate možete pronaći na našoj stranici: [www.omladina-bih.net](http://www.omladina-bih.net).

Istraživanje smo obavili uz svesrdnu pomoć naših kolega iz PRONI Brčko, a izvršeno je u kolektivnim centrima: Tuzla (Mihatovići, kolektivni centar) u Federaciji BiH; Bratunac (ljudi koji su živjeli u kolektivnom centru Kravice) u Republici Srpskoj i Brčko Distrikt (Prutače, kolektivni centar). Istraživanje će poslužiti kao polazni materijal za lobiranje prema vlastima u BiH, a u vezi unapređenja situacije i rješavanje nagomilanih problema sa kojima se susreću mladi koji su smješteni u kolektivnim centrima u BiH.

### ► Konsultativni sastanak Tuzla, 8. april

Svrha ovog konsultativnog sastanka bila je predstavljanje projekta, predstavljanje rezultata istraživanja, te sagledavanje pretpostavki i mogućnosti za buduće aktivnosti (2016. – 2017.) u eventualnom zajedničkom djelovanju, koje bi mogle doprinijeti povećanju sigurnosti mladih u kolektivnim centrima i poboljšanju situacije u kojoj ovi mladi ljudi žive. Sastanku u Tuzli je prisustvovalo dvadeset predstavnika institucija i nevladinih organizacija, koje su prepoznate kroz inicijalno istraživanje kao ključni akteri koji imaju interes i nose dio odgovornosti za sigurnosni aspekt mladih koji žive u tri „kolektivna/alternativna“ centra u: Mihatovićima, Bratuncu i Brčko distriktu BiH.



Prisutni na sastanku izrazili su zabrinutost i razumijevanje za situaciju u kojoj se nalaze mladi koji već godinama žive na apsolutnim marginama društvenih zbivanja i suočavaju se sa sigurnosnim izazovima koji su jedinstveni za ovu kategoriju stanovništva u BiH i umnogome se razlikuju od sigurnosnih izazova sa kojima se susreću mladi koji ne žive u „kolektivnim/alternativnim“ centrima. Neki od istaknutih sigurnosnih izazova su **ekonomska nesigurnost, manjak zaštite i manjak razumijevanja** od nadležnih institucija kao i **kulturne razlike** stvorene među mladim ljudima koji žive u „kolektivnim/alternativnim“ centrima i ljudi koji žive u okolnim lokalnim zajednicama.

Učesnici sastanka su iznijeli slijedeće prijedloge, koji su i usvojeni u formi zaključaka:

- Otvaranje ili osposobljavanje postojećih objekata koji bi bili namijenjeni za rad sa mladima u njihovom slobodnom vremenu;
- Tražiti od nadležnih institucija, Ministarstva za ljudska prava i izbjeglice BiH, da se više uključe NVO-i iz BiH u programe koje sprovodi ovo Ministarstvo;
- Povećanje saradnje policije i drugih institucija sa mladima kroz uspostavu mehanizama za komunikaciju i saradnju;
- Aktivniji rad NVO-a sa mladima iz izbjegličkih centara.

## Omladinska grupa ORC Tuzla

### ► Forum „most prijateljstva“

Forum „Most prijateljstva“, čiji je cilj širiti mrežu organizacija i pojedinaca koji svojim radom doprinose razvoju prijateljstva i razumijevanja među ljudima, ove godine nastavlja sa širenjem svojih aktivnosti u četiri nova grada. Prva stanica Karavana prijateljstva mladih je bila u Pančevu. U periodu od 16. do 17. aprila, mladi iz Makedonije, Srbije i Bosne i Hercegovine imali su priliku da se upoznaju sa historijom grada Pančeva. Ovaj događaj okupio je oko 30 mladih ljudi, srednjoškolaca i studenata, koji su imali priliku da međusobno razmijene kulturne stavove i ideje, te da uoče da je zapravo različitost ta koja ih i povezuje. Svrha aktivnosti „Upoznajmo se da bi nam život bio ljepši“ je širenje ideje prijateljstva, solidarnosti i povjerenja među ljudima kao temelja prirodnog sistema vrijednosti. Predstavnici ORC Tuzla na ovoj aktivnosti bili su Jasmina Begović, Marta Brendić i Mirela Husićić.



### ► FEM Kamp „Mlade žene agentice pozitivnih promjena“

Ove godine je u Sarajevu, od 01. do 03. aprila održan FEM Kamp, koji svake godine organizuje Fondacija CURE. Tema ovogodišnjeg FEM Kampa je bila: „Mlade žene agentice pozitivnih promjena“, gdje je na zanimljiv način omogućeno da se upoznamo sa temama koje se tiču aktivizma, sa osnovnim teorijama feminizma, ženskih ljudskih prava, cyberbullynga, rodno zasnovanog nasilja, kako raditi na prevenciji rodno zasnovanog nasilja, te na taj način ohrabriti nove generacije da se aktivno uključe u pozitivne društvene promjene. Prvi dan kampa prošao je kroz upoznavanje učesnica, a zatim i upoznavanjem osnovnih termina koji se tiču feminizma i ženskih



ljudskih prava, pravnih okvira u BiH i sl. Drugi dan je bio dosta produktivniji i aktivniji, sa nekoliko prezentacija o već pomenutim temama. Također smo imali i nekoliko radionica, na kojima je naš zadatak bio da istražimo o važnim ličnostima feminizma i fazama razvoja feminizma, gdje smo na kreativan način trebale da istaknemo sve važnosti određene faze. Imale smo priliku i da pogledamo nekoliko dokumentarnih filmova.

### ► Drvo za Angelinu



Članovi Omladinske grupe ORC Tuzla učestvovali su u akciji sađenja drveća koja je bila organizovana u gradu Tuzla i nekoliko obližnjih opština. Akcija je provedena u znak sjećanja na veliku aktivistkinju i filantropkinju Angelinu Hodžić.

Akciju je organizovala Fondacija tuzlanske zajednice 9. aprila 2016. godine.

## + Predstavljamo mlade!

**LEJLA MUJKIĆ**


*Lejla Mujkić ima 19 godina i živi u Tuzli. Članica je omladinskog resursnog centra već dvije godine.*

*Voli reći da ju je Omladinska grupa ORC mnogo promijenila i pružila joj mnoštvo lijepih iskustava, prijateljstava i neformalnog obrazovanja.*

*Lejla je završila srednju Mješovitu školu u Tuzli, smjer veterinarski tehničar. U budućnosti pored aktivizma ima želju i upisati Medicinski fakultet. Također, aktivno se bavi i folklorom već 13 godina.*

**HUSEIN ŠLJIVIĆ**


*Husein Šljivić je četvrti razred srednje Mašinske škole Tuzla, smjer kompjutersko projektovanje. Član je Omladinskog resursnog centra Tuzla. Kroz NVO sektor učestvovao je na raznim seminarima, razmjenama i treninzima. Pored toga u slobodno vrijeme uživa u planinarenju, čitanju i muzici.*

## + Redovne aktivnosti ORC i hCa Tuzla:

Tokom aprila radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

## PLANOVI HCA/ORC-a ZA MAJ 2016.

- Sprovođenje redovnih aktivnosti kroz Omladinsku mrežu BiH;
- Nastavak aktivnosti u okviru Prekogranice građanske mreže za mir, pomirenje i sigurnost ljudi na Balkanu (izdavanje publikacije – policy brief), učešće na Forumu nevladinih organizacija u Sofiji „Procjena novih rizika, proširenje mreže HS“. Forum će se održati od 11. do 13. maja.
- Aktivno učešće u međunarodnoj ALF mreži, održavanje i logistička podrška ALF mreži Bosne i Hercegovine;
- Nastavak rada na namicanju sredstava za 2016. godinu.

# AKTIVNOSTI ČLANICA OMLADINSKE MREŽE BIH



## **ANESA HIDIĆ, ČLAN OMLADINSKE MREŽE, POJEDINAC**

OMLADINSKI KRUG KLADANJ

E-mail: anesahidic@hotmail.com

### **POSJETA PORODICI MUSIĆ**

Dana 19.04.2016. godine grupa studenata Građevinskog fakulteta iz Francuske posjetila je porodicu Musić. Porodica Musić živi u veoma teškim uslovima. Zahvaljujući Secours Populaire Français (SPF) i Općini Kladanj pokrenuta je akcija za izgradnju doma za porodicu Musić. ■



### **BAHRUDIN TRBALIĆ IZ KLADNJA POSTAO JEDINI STIPENDISTA PRESTIŽNOG MIT-a**

Bahrudin Trbalić iz Kladnja postao je jedini Bosanac i Hercegovac koji se uspio upisati na prestižnu školu Massachusetts Institute of Technology - popularni MIT. ■



### **TARIK GURDA IZ KLADNJA PRVI NA KANTONALNOM TAKMIČENJU IZ INFORMATIKE**

U organizaciji Pedaškog zavoda TK i JUMS Elektrotehničke škole iz Tuzle, 23.04.2016. godine održano je kantonalno takmičenje iz informatike. Na ovom takmičenju učešće je uzelo oko pedeset učenika iz svih gradova Tuzlanskog kantona, a prvo mjesto osvojio je Tarik Gurda iz Kladnja. ■

### MEKTEBSKO TAKMIČENJE NA NIVOU MEDŽLISA

10.04.2016. godine Hadim Ali-pašina džamija u Kladanju bila je domaćin održavanju mektebskog takmičenja na nivou Medžlisa. Učesnici su bili polaznici mektebske nastave iz naših džemata, a takmičili su se u sljedećim kategorijama: Test općeg znanja iz Ilmihala, učenje Časnog Kur'ana, mlađa i starija kategorija.

*Test općeg znanja iz Ilmihala:*

1. Omerović Mirha (Kuršumlija),
2. Hurić Ismail (Kuršumlija),
3. Musić Ajla (Nočajevići)

*Kiraet, učenje Kur'ana – mlađa kategorija:*

1. Avdić Lejla (Tarevo),
2. Hodžić Enes (Kuršumlija),
3. Krekić Alma (Brateljevići)

*Kiraet, učenje Kur'ana – starija kategorija:*

1. Spahić Lamija (Kuršumlija),
2. Imamović Lejla (Tarevo),
3. Taranović Ermina (Nočajevići)

### IZVRŠENA AKCIJA ČIŠĆENJA I UREĐENJA ZELENIH POVRŠINA

U okviru generalne akcije „April mjesec čistoće“ na području općine Kladanj izvršeno je čišćenje školskih dvorišta, parkova i užeg jezgra grada.



Akciju koju je organizovala Općina Kladanj, a čiji je cilj bio uređenje životnog prostora i podizanje svijesti o ekologiji, podržale su osnovne škole Kladanj i Stupari, srednja škola „Musa Ćazim Ćatić“, dječije obdanište „Edina Čamdžić“, šumsko gazdinstvo „Konjuh“ Kladanj i IKC „Kladanj“.



## OMLADINSKA ORGANIZACIJA „SVITAC“

Jusufa Čampare bb, 76100 Brčko Distrikt

Tel./Fax: 049 211 032

Email: [svitac@teol.net](mailto:svitac@teol.net)

Web: [www.svitac.org](http://www.svitac.org)

FB: [www.facebook.com/omladinska.svitac](https://www.facebook.com/omladinska.svitac)

### Dnevne radionice

Omladinska organizacija Svitac je u aprilu nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupa sa mališanima je ovog mjeseca pravila dekoracije na temu proljeće, razne vrste cvijeća i trakica, te papirne ptice koristeći vodene, drvene i akrilne boje, kao i vatu, ljepilo, karton, mekanu žicu i kolaž papir. Učesnici dnevnih radionica su takođe pravili figure od plastelina, te razne kolaže. Jutarnja mala grupa je svakog četvrtka učila i ponavljala brojeve od 1-8 koristeći radne listove za bojenje i oblike i boje na engleskom jeziku. Grupa je takođe vrijedno vježbala tekst i melodiju pjesme „Djeca su ukras svijeta“, koju su izveli na „Proljetnom festivalu“ u aprilu. Cilj ovih aktivnosti je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugima i usvoje lijepo ponašanje. U aprilu je između 20-25 učesnika svaki dan pohađalo jutarnje kreativne radionice.



Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).

Ponedjeljkom je na rasporedu engleski jezik, komunikacija, izgovor, i fleš kartice za ponavljanje vokabulara i sastavljanje rečenica, te igra Monopol uz vježbanje postavljanja pitanja na engleskom jeziku. Grupa je takođe i ovaj mjesec rješavala gramatičke zadatke i vježbala rečenice u Pasivu. Utorkom je kreativno izražavanje; ovaj mjesec tema je bila 3D. Pored toga radili su na pravljenju cvijeća od krep papira i mekane žice, letećih balona sa korpama od šarenog kartona, raznih figura od tijesta i kreativno izražavanje kroz crtanje i slikanje koristeći akrilne boje, flomastere, drvene bojice i kolaž papire. Srijedom se održava muzička radionica, na kojoj učesnici imaju priliku da nauče osnove teorije muzike i notni sistem, te da razvijaju sposobnosti komunikacije i dijaloga na temu 'ritam'. Grupa je u aprilu radila na tekstu i melodiji pjesme „Let it be“, koju su izveli na „Proljetnom festivalu“, u aprilu. Četvrtkom je sportski dan gdje se organizuju razne vrste igara sa loptom, upoznavanja sa osnovama karatea, i za zabavu magični trikovi i dramske radionice sa skečom (Karius i Bakterius). Grupa je podijeljena u dvije manje i učesnici imaju mogućnost da izaberu sport ili dramu.

Petak je dan za učenje osnova njemačkog jezika, kao i za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u aprilu bila je Slađana Bašić uz asistenciju lokalnih i Weltwaerts i EVS međunarodnih volontera Jonasa Kiesnera, Anne Bonitz i Johanne Weng iz Njemačke, Vanesse Brumen i Therese Bittman iz Austrije, te Monice Reeves iz Velike Britanije. Broj učesnika starije grupe je trenutno između 15 i 20. ■

### *Jezičke radionice*

Kursevi engleskog i njemačkog jezika nastavljani su i u aprilu. 35 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu).

Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskog centra Brčko distrikta. Starost studenata je od 8 do 35 godina.

### *„Pričajmo njemački“ – radionice komunikacije na njemačkom jeziku sa izvornim govornicima*

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-20:00 časova. Zbog velike zainteresovanosti i različitih nivoa poznavanja jezika i gramatike, učesnici su podijeljeni u dvije grupe, grupu za početnike (novi A1) i napredne (A2, B1, B2). Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. Koordinator projekta su međunarodne volonterke iz Njemačke Anne Bonitz i Johanna Weng. Radionice je u aprilu pohađalo ukupno 25 učesnika (obje grupe).



### *„I love English“ – radionice komunikacije na engleskom jeziku sa izvornim govornicima*

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku namijenjene su za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. Koordinator projekta je međunarodna volonterka iz Velike Britanije Monica Reeves. Radionice je u aprilu pohađalo 7 učesnika. ■

### *Dramske radionice*

Projekat „Dramske radionice“ za mlade ljude održava se svakog utorka u prostorijama Omladinskog centra Brčko distrikt od 19:30-21:00 časova. Grupa trenutno radi na komediji „Ne mora uvijek biti Šekspir“. Vježbe zagrijavanja u trajanju od 10 do 20 minuta su od velike pomoći za opuštanje prije aktuelne realizacije radionice. Cilj ovog projekta je da mladi ljudi koji vole pozorište i glumu usvoje nove vještine, te da steknu nova iskustva i poznanstva. Koordinator projekta je Anne Bonitz, međunarodna volonterka iz Njemačke. Dramske radionice u aprilu je pohađalo 10 učesnika, uzrasta 16+. ■

### *„Freeletics“ – sportske radionice*

Sportske radionice „Freeletics“ se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt. Radionice su namijenjene za mlade ljude koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator projekta je Miloš Popić. Radionice u aprilu je pohađalo 9 učesnika. ■

### *Muzičke radionice*

U aprilu je EVS volonterka, Monica Reeves, uz pomoć lokalnih volontera pripremila niz muzičkih radionica sa različitim sadržajima. Učesnici radionica proširivali su svoja znanja o notnom sistemu, uvježbavali pjesmu „Let it be“ (Beatles) i radili ritmičke igre i vježbe u cilju razvijanja motoričkih sposobnosti.

### *Radionice gitare*

Učesnici radionice gitare u aprilu su nastavili sa redovnim radom i pohađanjem radionica.

Među radovima koje učesnici uvježbavaju nalaze se:

- „Recuredos de la Alhambra“, Gran Vals“ i „CaprichoArabe - Francisco Tarrega
- „Prima vera-Spring time“ i „Sogno“ - Carlo Domeniconi
- Dueti „Libertango“ - Astor Piazzolla, „Gymnopedie“ (Erik Satie)

te niz etida različitih muzičkih epoha i stilova, kao i dječijih i popularnih pjesama sa područja Balkana i šire.



### *Radionice sambe*

U aprilu je na radionicama samba udaraljki redovno prisustvovao veliki broj internacionalnih volontera. Na ovaj način ova radionica pruža mogućnost lokalnim i internacionalnim volonterima kao i učesnicima ove aktivnosti da upoznaju druge kulture i razmjene iskustva u opuštenom i sigurnom okruženju kroz muziku i aktivan rad. Grupa je radila na poznatim kompozicijama, a dio vremena bio je posvećen improvizaciji. ■

### *PROLJETNI FESTIVAL 2016*

Omladinska organizacija Svitac je organizovala 22.04.2016. sa početkom u 18:00 časova, u prostorijama Omladinskog centra Brčko distrikta „Proljetni festival“ - večer druženja i zabave.

Interesantan program, koji su pripremili internacionalni i lokalni volonteri bio je namijenjen za porodicu i prijatelje učesnika, ali takođe i za djecu i mlade ljude iz Brčkog. Publika je imala priliku da čuje izvedbe članova sekcije gitare, čiji je koordinator Sanjin Vošanović, a koji su pripremili duet kompozicije od Franceska Tarege i Andrew Foresta.

U nastavku programa učesnici dnevnih aktivnosti, uzrasta 4-6 godina, su izveli dvije pjesme: „Djeca su ukras svijeta“ i „I love the flowers“ na engleskom jeziku, koje je sa njima pripremila međunarodna volonterka Monica Reevez iz Škotske, zajedno sa koordinatorom dnevnih aktivnosti Slađanom Bašić i ostalim lokalnim i međunarodnim volonterima. Članice popodnevnih dnevnih aktivnosti izvele su tri vokalne pjesme, a publika je imala priliku da čuje i klasični komad „Tanec“ na flauti.



Učesnici dnevnih aktivnosti uzrasta 7+ godina izveli su pjesmu „Let it be“ od Beatlsa, koju je sa njima pripremila međunarodna volonterka Monica Reevez iz Škotske.

Međunarodna volonterka Anne Bonitz iz Njemačke je pripremila sa dramskom grupom kratki poučni skeč „Karius i Bakterius“ sa porukom da se zubi moraju redovno prati.

Nakon programa gosti su imali priliku da u velikom holu Omladinskog centra Brčko pogledaju izložbu radova sa kreativnih radionica, i da se osvježe uz sokove, grickalice i domaće kolače koje su pripremili internacionalni volonteri. Proljetni festival je posjetilo oko 100 gostiju. ■

### OTVORENI POZIV ZA VOLONTERE IZ BiH

1. Koliko dugo: **1 mjesec**

Kada: **22. juli - 21. avgust 2016**

Gdje: **Don Bosco: Amsterdam i Rijswijk, Holandija**

Pozicije: 2 volontera (od 18-30 godina)

Naziv EVS projekta: Proslava 50 godina volontiranja (Vakantiebos)

Krajnji rok za aplikacije: dok se pozicije ne popune

2. Koliko dugo: **12 mjeseci**

Kada: **od 16. avgusta 2016 do 15. avgusta 2017.**

Gdje: **Brizu krasto muziejus Sela (muzej), Litvanija**

Pozicije: 1 volonter (od 18-30 godina)

Naziv EVS projekta: „Second wave“

Krajnji rok za aplikacije: dok se pozicija ne popuni

Za više informacija o volontiranju i kako aplicirati kontaktirati Miloša Popića na email: [svitac.evs@gmail.com](mailto:svitac.evs@gmail.com)

Za maj se planira nastavak svih redovnih radionica Omladinske organizacije Svitac. ■



## H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Doboje


Tel./fax: 053 226 886

E-mail: merhamet.doboj@cutuk.net

Web: www.ngo.ba

FB: www.facebook.com/Merhamet-Doboj

U hotelu Integra Doboje 30. marta 2016. godine - održan je regionalni sastanak predstavnika radnih grupa za izradu Plana kohezivne zajednice i koalicija protiv mržnje, na kojem je prisustvovala predsjednica H.O. „MERHAMED“ Faketa Avdić.



Održan je okrugli stol u domu zdravlja u organizaciji odjela za mentalno zdravlje na temu „Borba protiv alkoholizma“, na kojem je prisustvovala predsjednica H.O. „Merhamet“, Faketa Avdić.



Predsjednica „Merhameta“ Avdić Faketa prisustvovala sastanku koalicije „Tolerantno i pozitivno“ iz Doboja.



Predsjednica „Merhameta“ Doboj prisustvovala otvorenju izložbe u sinagogi povodom stradanja Jevrejskog naroda u Zemunskom kraju.



Predsjednica H.O „Merhameta“ Doboj prisustvovala u Tešnju Skupštini unije za održivi povratak i integracije.




Volonteri „Merhameta“ Doboj Melisa Mujanović i Damir Školjić su takođe učestvovali u aktivnosti „Zid mira“ u okviru projekta „Jedinstvo u različitostima“, a koji je implementirala omladinska organizacija „Šesto čulo“ Doboj.



Predsjednica „Merhameta“ Doboj Avdić Faketa prisustvovala je otvorenju agencije Lavirint.



Sastanak Regionalnog odbora „Merhameta“ u Banja Luci.




„Mlin Rebronja“ Doboj istok donirao je „Merhametu“ Doboj tonu brašna! Srdačno im se zahvaljujemo.



Avdić Faketa učestvovala na edukaciji CPCD ORG na temu: „Održivost kao najveći izazov organizacija civilnog društva“.



Aktivnost povodom implementarnog projekta pčelarstva - donator Federalno Ministarstvo.





## INSTITUT ZA RAZVOJ MLADIH KULT

Ul. 4. viteške brigade 34-36 BA, 71210 Ilidža, Sarajevo

E-mail: [kult@mladi.org](mailto:kult@mladi.org)

Tel.: 033 778 778; fax: 033 778 779

Web: [www.mladi.org](http://www.mladi.org)

### *Privrednici žele izmjene Zakona o PDV-u – Pismo podrške za samo pet dana potpisalo više od 20.000 privrednika*

Institut za razvoj mladih KULT, kako bi intenzivirao proces izmjene Zakona o PDV-u, u aprilu je pokrenuo inicijativu potpisivanja pisma podrške procesu izmjene Zakona o porezu na dodanu vrijednost Bosne i Hercegovine.

Pismo podrške prvenstveno je namijenjeno privrednicima, a u prvih pet dana potpisalo ga je više od 20.000 privrednika okupljenih oko privrednih i obrtničkih komora, te udruženja koja u fokusu svog rada imaju pomoć privredi. Inicijativu su podržali i predstavnici Udruženja poslodavaca FBiH koje broji oko 25.000 članica, a koje imaju više od 100.000 zaposlenih. Institut za razvoj mladih KULT zalaže se za izmjene Zakona o porezu na dodanu vrijednost prema kojim bi poreski obveznici PDV plaćali nakon što naplate svoja potraživanja, a ne do 10. u mjesecu, kako to trenutni zakon nalaže.

Trenutni zakonski propisi stvaraju poslovno okruženje u kojem mala i srednja preduzeća često prestaju sa poslovanjem, te su izmjene neophodne.

Institut će sa prikupljanjem pisama podrške nastaviti i u maju, ali i sa zagovaranjem izmjena Zakona o PDV-u kod predstavnika vlasti.

Pismo podrške dostupno je na web portalu: [www.podrzi.poslovniprostorbh.org](http://www.podrzi.poslovniprostorbh.org)

Institut za razvoj mladih KULT je, kroz petnaest godina postojanja, radio vrlo uspješno na izradi i provođenju zakonskih rješenja koja doprinose poboljšanju društvenog položaja mladih, ali i građana općenito. S obzirom da su ekonomska pitanja izvor većine problema mladih ljudi, Institut se snažno zalaže za aktivnosti i inicijative koje za cilj imaju stvaranje povoljnijeg poslovnog prostora u BiH, ne samo za mlade nego za sve poduzetnike.

Zagovaranje izmjene Zakona o PDV-u provodi se u okviru inicijative „Poslovni prostor BH“, koju vodi Institut za razvoj mladih KULT. Inicijativa je dio Projekta održivosti civilnog društva u Bosni i Hercegovini (CSSP), koji provode Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID). ■

### *Dan otvorenih vrata - Više od stotinu osnovaca posjetilo Obrazovno-raznodni centar za mlade Spajalica*

U Obrazovno-raznodnom centru za mlade SPAJALICA na Ilidži, 22. aprila 2016. godine organizovan je „Dan otvorenih vrata“.

Tokom dvosatnog programa predstavljen je način rada i ponuda SPAJALICE, a centar je posjetilo više od stotinu osnovaca.

Učenici/ce osnovnih škola učestvovali su u radionicama posvećenim obilježavanju 22. aprila – Dana planete Zemlje, različitim tematskim kvizovima, te brojnim interaktivnim igricama.



Ispred Obrazovno-raznodnog centra za mlade SPAJALICA organizovane su i sportske igre za osnovce. Učenici/ce su uz nadzor nastavnika, te volontera i volonterki, učestvovali u različitim takmičenjima i igrama snalažljivosti.



„Spajalica je jedan od rijetkih centara ovakvog tipa u Bosni i Hercegovini i drago nam je da možemo reći da već osam godina mladim osobama pomažemo u njihovom odrastanju i formiranju. Stručno osoblje centra svakodnevno, kroz različite radionice, kurseve i druge aktivnosti radi sa školarcima i pomaže im da svoje slobodno vrijeme provode sa smislom. To u konačnici i jeste misija ovog centra, pomoći u kreiranju društva koje mladim ljudima nudi okruženje u kojem mogu postati zadovoljnim i društveno odgovornim građankama i građanima“ – poručila je Vesna Filipović, voditeljica Obrazovno-raznodnog centra za mlade SPAJALICA.

Održavanje „Dana otvorenih vrata SPAJALICE“ podržala je i Općina Ilidža, čiji su predstavnici posjetili centar. ■

### *Studijska posjeta Švedskoj: Prvo putovanje, novo znanje i nezaboravno iskustvo*

Stručni saradnici/ce za rad s mladima učestvovali su u studijskoj posjeti Kraljevini Švedskoj.

Troje mladih, koji su prethodno završili obuku za rad s mladima, dobili su priliku upoznati se sa načinima na koje se u ovoj zemlji radi s mladima, te vodi briga o pitanjima mladih.

U petodnevnoj posjeti Stockholmu polaznici/ce iz udruženja „Čisto srce“ iz Prijedora, Omladinske organizacije „Carpe Diem“ iz Ilijaša, te „SOS Dječijih sela BiH“ imali su priliku upoznati se sa mnogim aspektima omladinskog rada u Švedskoj.

Prilikom posjeta različitim organizacijama, susreli su se s omladinskim radnicima/cama koji u Švedskoj svakodnevno rade s mladima. Upoznali su se s osobljem umjetničkih galerija koje imaju programe namijenjene mladima, posjetili su muzej na otvorenom koji ima program saradnje sa školama i centrima za mlade, te druge volonterske organizacije. Posjetili su i Frysushet, jedan od najvećih centara za mlade u svijetu, te učestvovali u radionici sa APU mrežom - organizacijom koja okuplja bh. dijasporu u Švedskoj.

Tokom sastanka sa predstavnicom Fysushet centra, mladi iz BiH upoznali su se pozitivnom praksom centra koji radi sa desetinama hiljada mladih ljudi. Iako je standard Kraljevine Švedske znatno veći nego standard Bosne i Hercegovine, te uzimajući u obzir činjenicu da Švedska ima dugu tradiciju omladinskog rada, ipak postoje prakse koje su itekako primjenjive i u BiH. Jedna od njih je individualni pristup mladima, sa posebnim akcentom na razvoj onih vještina i znanja koja su mladima lična strast i interes. Na ovaj način Frysushet u svoj rad uključuje mlade koji su inače isključeni iz društva, te tako formira aktivne građane i građanke.

„Naučila sam dosta toga što možemo i mi da prepíšemo ili prilagodimo svojim uslovima. Upoznali smo se sa načinom rada velikih organizacija što me inspirisalo da se nastavim baviti ovim poslom i još aktivnije radim sa mladima. Posebno je važno da smo imali priliku razgovarati sa mladima koje mi ovdje zovemo „dijaspora“, razmijeniti iskustva sa njima, ali i razgovarati o modelima zajedničkog rada koji u konačnici vodi ka poboljšanju položaja mladih, ali i približavanju dijaspore nama u BiH.“ - istakla je Tijana Grujičić, učesnica studijske posjete.

Tokom susreta sa predstavnicima APU Mreže, učesnici studijske posjete upoznali su mlade iseljenike iz BiH, druge i treće generacije, te s njima razgovarali o položaju mladih Bosanaca i Hercegovaca u Švedskoj, ali i Bosni i Hercegovini. Kroz zajedničku radionicu mladi su se osvrnuli na ciljeve, razlike koje postoje među njima, te mogućnosti suradnje i ostvarivanja zajedničkih projekata. Uspjesi mladih iz BiH su veoma cijenjeni, a procjenjuje se da u Švedskoj sada živi oko 100.000 bh državljanina koji su i primjer najbolje integracije u društvo.



Posebnu pažnju mladih iz BiH privukla je i organizacija Cyclope koju su potpuno volonterski izgradili mladi i njihovi sugrađani vlastitim snagama. Zajednica je dala svoj doprinos kroz sredstva, ali na izgradnji su radili isključivo mladi. Rad ove organizacije i danas se ogleda u potpunom volonterskom angažmanu svih uposlenih.

Studijska posjeta Kraljevini Švedskoj za neke od učesnika bila je i prvo putovanje izvan granica Bosne i Hercegovine, pa je osim edukativnog imala i karakter interkulturalne razmjene.

„Ponekad čovjek pomisli da nije spreman za korak naprijed i ostaje u mjestu, razmišljajući i radeći u okvirima jedne kutije izvan čijih zidova je nesiguran. Ne osuđujem nikoga, i sama sam takva bila. Vjerujte u sebe i hrabro kročite izvan, hrabro kročite naprijed. Vidjet ćete svijet drugim očima i sebi stvoriti ljepši, produktivniji i sretniji život.“ - poručila je mladima Elma Čutura, učesnica studijske posjete.

Domaćin posjete je bio Kommunal Stosholm (sindikatski grad Stockholm) koji pored svog redovnog rada ima i zaseban sektor rada sa mladim radnicima/cama. Kroz svoj rad ovaj sektor Kommunalala radi s mladima na upoznavanju njihovih radničkih prava, te prilika za usavršavanje i napredovanje. Posjeta posvećena omladinskom radu i razmjena iskustva sa mladima iz Bosne i Hercegovine tek je jedan od načina na koji Kommunal uključuje mlade u svoj rad. Saradnja Instituta za razvoj mladih KULT i Kommunalala u oblasti rada s mladima nastaviti će se i u narednom periodu.

Studijska posjeta je dio Obuke za stručne suradnike/ce za rad s mladima koju Institut implementira već dvije godine, uz podršku Olof Palme Centra i sponzorstvo Kommunal Stocholm. ■



## VIJEĆE MLADIH OPĆINE TOMISLAVGRAD


Ul. Kralja Zvonimira bb, 80240 Tomislavgrad

Tel.: 034 356 440, fax: 034 356 444

E-mail: vijecemladih.tg@gmail.com

### *Vijeće mladih općine Tomislavgrad doniralo uredski materijal kreativnoj/likovnoj sekciji Srednje strukovne škole u Tomislavgradu*

Kreativna/likovna sekcija Srednje strukovne škole Tomislavgrad bogatija je za uredski materijal koji im je doniralo Vijeće mladih općine Tomislavgrad za potrebe njihovog rada. Tom prigodom je održana kreativna likovna radionica koju su organizirale profesorice, voditeljice sekcije, potičući učeničku radoznalost u otkrivanju novog, poštujući individualnost, stvaralačku kreativnost, slobodu i osobnost likovnog izričaja.



U Srednjoj strukovnoj školi inače djeluje aktivna kreativna/likovna sekcija koju pohađa određeni broj učenika. Učenici su se dobrovoljno uključili u rad sekcije, izražavajući interes i posebne sklonosti prema likovnom stvaralaštvu. Plan rada likovne sekcije usklađen je potrebama, interesima i sposobnostima učenika. Likovna sekcija SSS Tomislavgrad svoj rad temelji na potrebama i programskim sadržajem predviđenim u radu škole, te sadržajima koji proizlaze iz nastave drugih nastavnih predmeta.



Aktivnosti koje provodi likovna sekcija u školi:

- Priprema i organizira zidne novine u školi
- Priprema i organizira izložbe likovnih radova
- Pomaže i surađuje sa svim sekcijama u školi
- Pomaže i surađuje u radu Vijeća učenika

- Učestvuje na natjecanjima iz područja likovnog stvaralaštva
- Promovira sposobnosti i znanja iz područja likovne kulture
- Sudjeluje na sajmovima na kojima promovira svoje radove
- Sudjeluje u akcijama na uređenju škole i školske okoline
- Sudjeluje u ekološkim akcijama te promoviraju značaj i ulogu zdrave sredine
- Pridonosi očuvanju i zaštiti etnografske, kulturne i povijesne baštine.



Programski sadržaj u nastavi likovne sekcije temelje se na području:

- Crtanje
- Slikanje
- Grafika
- Modeliranje i građenje
- Primjena umjetnosti i dizajna

Više na našoj web stranici: [www.vijecemladih-tg.com](http://www.vijecemladih-tg.com)

### *Studijska posjeta mladih iz Tomislavgrada Derventi*

Proteklog vikenda Vijeće mladih općine Tomislavgrad organiziralo je studijsku posjetu općini Derventa za skupinu mladih iz Tomislavgrada.


Posjeta je organizirana kao dio projekta razmjene između centara za mlade u Bosni i Hercegovini pod nazivom: „Peaceful life and Cooperation 20 years later“, Instituta Perpetuum mobile iz Banja Luke, kao nositelja projekta. Sam projekt ima za cilj povećati povjerenje razinu interkulturalne interakcije među zajednicama i radnicama i radnicima koji rade s mladima u Bosni i Hercegovini. Projekt podržava Veleposlanstvo SAD-a u Sarajevu.



Mladi aktivisti iz Centra za mlade "Derbent" iz Dervente ugostili su mlade iz Tomislavgrada i bili dobri i domaćini, kao i turistički vodiči. Tijekom posjete Derventi, volonteri i aktivisti "Derbenta" sa gostima su nazočili sastanku u zgradi Općine Derventa, gdje su ih dočekali predstavnici Općine, novinari, kao i predstavnici mladih iz ove općine. Ovom prigodom je na sastanku bilo govora o uvjetima i načinima rada sa mladima u dvjema općinama, mogućnostima i potencijalima buduće suradnje, razlikama i sličnostima u modalitetima rada sa mladima i njihovim potencijalima. Obje općine su na različit način pokazale zabrinutost za odljev mladih iz ovih općina, mada su obje općine ukazale na pozitivne pokazatelje u privrednim uspjesima i potencijalima koji bi trebali s vremenom biti razlozi zbog kojih bi se ti isti mladi vraćali u ove općine. Nakon uspješnog i zanimljivog sastanka domaćini su goste proveli kroz grad. Tako su obišli muzej i knjižnicu, turističku organizaciju, kao i zanimljive lokalitete u samoj Derventi.

Također je održana i radionica u prostorijama Centra za mlade "Derbent" na temu: „Volonterizam, aktivizam i mobilnost mladih“. Cilj radionice je bila razmjena iskustava i rada sa mladima u ovim organizacijama, problemi i rješenja koji su karakteristični za ovu temu, kao i moguće suradnje i projekti u bliskoj budućnosti. Aktivisti i volonteri Centra za mlade "Derbenta" pokazali su zanimanje za projekt suradnje s organizacijama mladih iz Tomislavgrada tijekom ljetnih projekata, koje provodi ovaj centar za mlade. Mladima iz Tomislavgrada se svidjela ideja o suradnji na ovakvim i sličnim projektima. Nakon radionice volonteri su zajedno s gostima obišli lokalitete Ambarina arheološkog nalazišta i upoznali se drugim prirodnim ljepotama Dervente.

Više na našoj web stranici: [www.vijecemladih-tg.com](http://www.vijecemladih-tg.com)





## PRONI CENTAR ZA OMLADINSKI RAZVOJ

Ul. Mehmedagića 24, 76100 Brčko distrikt BiH

Tel./Fax: 0038749217695

E-mail: pronibrc@teol.net

Web: www.pronibrcko.ba

### Radionicu na temu Volontiram – Aktiviram

Predstavnici PRONI Centra za omladinski razvoj i Damar iz Visokog su u subotu 23.04.2016. organizovali radionicu na temu Volontiram – Aktiviram.

Radionica je organizovana kao dio projekta razmjene između omladinskih centara u Bosni i Hercegovini pod nazivom „Peaceful life and Cooperation 20 years later“ Instituta Perpetuum mobile, koji ima za cilj da poveća povjerenje i nivo interkulturalne interakcije među zajednicama i omladinskim radnicima/cama u BiH.

Radionici su prisustvovali omladinski radnici/e iz MZ Vučilovca, MZ Omerbegovače i Brčkog.

Domaćin je bio omladinski klub Omerbegovača.



### Trening za mlade „Aktiviraj se“

U subotu i nedjelju, 23. i 24.-og aprila u prostorijama UG „Otaharin“ u Bijeljini, predstavnici PRONI Centra za Omladinski razvoj i LVS Bijeljina održali su trening za mlade pod nazivom „Aktiviraj se“, koji sprovodi Institut za mlade Perpetuum mobile, a projekat podržava Ambasada Kraljevine Holandije u Sarajevu.

Cilj projekta je poboljšanje kapaciteta i mogućnosti za mlade da utiču na parlamentarne procese koji se bave specifičnim pitanjima mladih.

Trening su činile radionice na temu

„Prepoznavanje problema“, „Zagovaranje i lobiranje“, „Aktivno glasačko pravo“ i „Komunikacijske vještine.“

Ovaj trening prošlo je 42 srednjoškolca iz svih srednjih škola sa područja opštine Bijeljina. Sve srednjoškolce u nastavku projekta očekuje se obilazak Parlamenta RS u Banja Luci i Parlamenta BiH u Sarajevu.





## ASOCIJACIJA SREDNJOŠKOLACA U BOSNI I HERCEGOVINI

Ul. Mula Mustafe Bašeskije br. 7, 71000 Sarajevo

Tel/fax: 033 205 850

E-mail: [asubih@yahoo.com](mailto:asubih@yahoo.com)

Web: [www.asubih.ba](http://www.asubih.ba)

### REGIONALNE EDUKACIJE

U cilju identifikacije problema srednjoškolaca u lokalnim zajednicama, ASuBiH ove godine organizuje edukacije za sve predstavnike naših lokalnih timova, u cilju osposobljavanja naših članova za prepoznavanje trenutnog položaja srednjoškolaca. Naša vizija je da do kraja godine prikupimo podatke iz 58 gradova, koje ćemo predstaviti na našoj Generalnoj skupštini, te odabrati one probleme na koje možemo djelovati u skorijem vremenskom periodu. Pored identifikacije problema, razgovarat ćemo o situaciji u našim lokalnim timovima, odnosu lokalne zajednice i ASuBiH-a, i pokazati im kako da predstave svoj rad u što boljem svjetlu. Pored toga, naše edukacije se održavaju u Zenici, Tuzli, Banjoj Luci i Mostaru, kako bi se približili našim timovima i sami osjetili atmosferu lokalne zajednice u kojoj ASuBiH djeluje. ■



### DAN SLOBODE MEDIJA

U u Hotel Grand 15.04. se održao pripremni sastanak za kampanju „3 maj Dan slobode medija“, koja će se održati u organizaciji Vijeća Za Štampu u Bosni i Hercegovini, ONAuBiH i Asocijacija srednjoškolaca u Bosni i Hercegovini. Članovi su trenutno u procesu pripreme kodeksa za štampu i online medije u BiH. ■

### TRAINING OF TRAINERS

Asocijacija srednjoškolaca u Bosni i Hercegovini zajedno sa Europskom srednjoškolskom organizacijom (OBESSU) organizovala je Trening trenera (Training of Trainers- ToT) u periodu od 1.4. do 4.4.2016. godine.



Europska srednjoškolska organizacija (OBESSU) će tokom 2016. godine implementirati Work Plan financiran od strane European Youth Foundation (EYF). Glavni cilj Work Plana je naglasiti važnost sudjelovanja srednjoškolaca u društvu. Cilj prve etape ovog projekta jeste stvaranje mreže trenera kao dijela OBESSU-a „Pool of Trainers“, koji će pripremati i implementirati treninge na teme učešća mladih i demokratskog građanstva. Na ToT-u će učestvovati 15 mladih ljudi iz čak 9 zemalja širom Europe. Neke od njih su: Njemačka, Španjolska, Češka, Kosovo, Finska, Ujedinjeno Kraljevstvo, Austrija, Srbija i naravno Bosna i Hercegovina, koja je i domaćin ovog događaja.



## WHO DOES YOUTH WORK



20 mladih ljudi okupili su se u srcu Beograda kako bi prisustvovali drugom WDYW seminaru. Ideja treninga je motivacija lokalne zajednice i učešće, gdje su učesnici dobili ekskluzivnu šansu da rade sa Vukašinom Grozdanovićem i da upoznaju ljude iz 6 različitih omladinskih organizacija.

Ispred ASuBiH-a išle su Valerija Blagojević, Ivana Filipović, Merisa Ćemo, a pred nama su još dva seminara u Podgorici i Berlinu.

## FORUM SREDNJOŠKOLACA

Asocijacija srednjoškolaca u Bosni i Hercegovini organizovala je u Domu omladine Forum srednjoškolaca, na kome je pet mladih govorilo o uloženom trudu i ostvarenim uspjesima u različitim oblastima.

Anđelka Živojinović, jedna od organizatora foruma, na pitanje zašto su zanemareni uspjesi ljudi koji naš grad pokazuju u ljepšem svjetlu odgovorila je: „Neke negativne teme zauzimaju primat i sprječavaju nas da fokus prebacimo na pozitivnije stvari, kao što su dostignuća mladih.“



## OMLADINSKI KLUB »DIJAMANT«

Ul. Bučići 42, 70101 Jajce

Tel./fax: 030 279 444, 061 179 209, 063 366 811

E-mail: m.sekib@bih.net.ba


Web: www.ocd-dijamant.net



### PROJEKAT "BUDI PROMJENA"

Predstavnici Omladinskog klub "Dijamant" Jajce, su 15.04.2016. godine u prostorijama Udruženja penzionera/umirovljenika u Jajcu, organizovali radionicu na temu „Rod i spol“. Radionica je organizovana kao dio projekta razmjene između omladinskih centara u Bosni i Hercegovini pod nazivom „Peaceful life and Cooperation 20 years later“ Instituta Perpetuum mobile, koji ima za cilj da poveća povjerenje i nivo interkulturalne interakcije među zajednicama i omladinskim radnicima/cama u BiH. Radionicu su vodile aktivistice iz Omladinskog centra „Cezar“ Ana Ćirić i Vanja Adamović iz Srpca, Banja Luka.

Projekat podržava Ambasada SAD-a u Sarajevu.



### Projekat „Hvala što čuvate životnu sredinu“

Implementiran je od strane Omladinskog kluba „Dijamant“ Jajce, a sufinansiran od strane Ministarstva prostornog uređenja, građenja, zaštite okoliša, povratka i stambenih poslova SBK/KSB.

Projekat je edukativnog karaktera i unapređuje ekološke u svijesti mladih ekologa i građana, a svrha je doprinijeti i značajno unaprijediti nivo svijesti kod mladih i građana, kao i važnost o zaštiti životne sredine, značaju upravljanja kućnim otpadom i poboljšanje eko-uslova životne sredine.

Za ciljeve smo imali: 1. Putem edukacije i javne kampanje kroz javne pisane i elektro medije jačati svijest građana i učeničke populacije o upravljanju zaštitom životne sredine, 2. Unaprijediti postojeći odnos građana o potrebama zaštite životne sredine i 3. Kroz volonterske akcije, urediti školsko dvorište „Berta Kučera“ Kruščica.

Mladi su imali priliku da, kroz edukativne, promotivne i praktične akcije iskažu nivo svijesti o značaju i zaštiti životne sredine. Moramo priznati da svijest građana nije na zavidnom nivo, te stoga moramo sve učiniti da se mijenjamo i tako zaštitimo svoju životnu sredinu i poboljšamo higijenske uslove u svojim sredinama, a da zajednica izdvaja više sredstava za ovakve aktivnosti.



# SAOPŠTENJA / INFORMACIJE / DONATORI / POZIVI

## *1. Obavijest o javnom pozivu US State Departmenta za dostavljanje projektnih aplikacija za podršku održivom povratku izbjeglica u Bosni i Hercegovini*

United States Department of State Bureau of Population, Refugees, and Migration (PRM) objavljuje poziv za dostavu projektnih aplikacija u okviru Julia Taft Fonda za izbjeglice. Julia Taft Fond za izbjeglice je posebno namijenjen pružanju podrške u povratku izbjeglica i raseljenih lica. Projektne aplikacije trebaju se odnositi na razvoj i provedbu programa u domenu zaštite i pružanja podrške izbjeglicama u Bosni i Hercegovini.

U 2015. godini podržani su projekti koji su se odnosili na kreiranje izvora prihoda za povratnike, obezbjeđenje pitke vode u udaljenim zajednicama, opremanje poljoprivrednih centara i zadruga i sl.

Traženi iznos granta ne može biti veći od 25.000 USD za projekte u maksimalnom trajanju do 12 mjeseci.

Sve zainteresirane organizacije mogu popunjene aplikacije poslati do četvrtka, 12. maja 2016. godine do 24:00 sati na email adresu: [zahtjevi@ppmg.ba](mailto:zahtjevi@ppmg.ba)

Više informacija možete pronaći na: <http://ppmg.ba/url/taft>

## *2. II poziv u 2016. godini za dostavljanje projektnih prijedloga za MAB program*

Fondacija Schüler Helfen Leben Sarajevo, otvorila je II poziv za dostavljanje projektnih prijedloga na program Movements Across Borders „MAB“ za 2016. godinu, koji je fokusiran na osnaživanje, povezivanje i zajednički angažman mladih osoba iz Bosne i Hercegovine i Srbije.

### **Informacije o programu Movements Across Borders (MAB)**

„MAB“ ima za cilj ojačati suradnju i međusobno povjerenje između mladih iz Bosne i Hercegovine i Srbije kroz pripremu i realizaciju zajedničkih aktivnosti iz oblasti omladinskog angažmana, koje sadrže komponentu grassroots pristupa. Ciljna skupina Programa su mladi u starosnoj dobi od 14 do 28 godina, koji su aktivni u nekoj neformalnoj grupi ili omladinskoj organizaciji.

### **Generalni ciljevi Programa su:**

- Uspostavljanje, ili daljnji razvoj zajedničkog socijalnog (društvenog) angažmana između mladih iz BiH i Srbije starosne dobi od 14 do 28 godina;
- Promoviranje aktivizma mladih kroz zajedničke grassroots aktivnosti koje doprinose solidarnosti, multikulturalnosti, multietničnosti i toleranciji mladih;
- Uspostavljanje društvene kohezije i kulturne razmjene mladih koja omogućava mladim osobama da pokažu svoju kreativnost i inovativnost;
- Kreiranje prostora za mlade u kojem će moći realizirati svoje aktivnosti;
- Aktivizam i volonterizam mladih;
- Razvoj lokalne zajednice kroz grassroots pristup.

### **Kakve projektne ideje podržava Fondacija SHL kroz program MAB?**

Fondacija SHL će podržati projektne ideje mladih koji sadrže sljedeće tačke:

- Projektne aktivnosti, usklađene s ciljevima „MAB“ programa;
- Projektni prijedlog zajednički su kreirali mladi iz BiH i Srbije;

- Projektni prijedlog sadrži grassroots aktivnosti;
- Projektne aktivnosti se realiziraju u dvije faze, jedna faza se održava u BiH, a druga faza projekta u Srbiji;
- Organizacije / aplikanti će koristiti model „lokalni domaćin” (grupa iz BiH prilikom realizacije aktivnosti odsjeda u kućama svojih vršnjaka u Srbiji, i obrnuto);
- Sve aktivnosti u sklopu projekta se realiziraju na volonterskoj osnovi;
- Koordinatorice projekta su u starosnoj dobi od 14 do 28 godina;
- Realizacija projekta maksimalno traje 8 mjeseci;
- Budžet projektnog prijedloga ne može prelaziti iznos veći od 5.000 KM;
- Projektni prijedlog dostavljen u oficijelnoj prijavnjoj formi programa MAB.

### ***Ko može prijaviti projektni prijedlog***

Program MAB je kreiran za omladinske organizacije iz Bosne i Hercegovine i Srbije i neformalne grupe (koje mogu prijaviti svoje projektne prijedloge preko registriranih udruženja građana), koje apliciraju u partnerstvu. Ako nemate partnersku organizaciju možete popuniti informativni obrazac koji možete preuzeti na ovom linku, a Fondacija SHL će nastojati da pronađe vašeg potencijalnog partnera s kojim možete aplicirati na MAB program.

### ***Način prijave***

Prijavnicu za MAB program možete preuzeti [ovdje](#), te istu dostaviti putem e-maila: [mab@shl.ba](mailto:mab@shl.ba). IV Poziv za dostavljanje projektnih prijedloga na MAB program otvoren je do **12. maja, 2016.** godine. Svi aplikanti će biti informirani o statusu svoje prijave.

Izvor: <http://www.hocu.ba/index.php/hocu.priliku/ii-poziv-u-2016-godini-za-dostavljanje-projektnih-prijedloga-na-mab-program/>

### ***3. EIDHR poziv za prijedloge projekata: Podrška civilnom društvu i zaštiti ljudskih prava u BiH***

Evropska unija je objavila javni poziv za dostavljanje prijedloga projekata koji imaju u cilju da podrže civilno društvo i organizacije koje štite ljudska prava u aktivnostima koje se tiču ljudskih prava (političkih, građanskih, ekonomskih, socijalnih i kulturnih prava) i demokratizacije.

Novi akcioni plan **Evropskog instrumenta za demokratiju i ljudska prava (EIDHR)** ima u cilju da ojača provedbu politike Evropske unije na polju ljudskih prava i demokratije sa posebnim naglaskom na jačanje vlasništva nad tim procesom kod lokalnih institucija, mehanizama i aktera civilnog društva, kao i da ojača podršku organizacijama koje se bore za ljudska prava i aktivistima demokratije.

### **CILJEVI PROGRAMA I PRIORITETNA PITANJA**

Globalni cilj ovog javnog poziva je provedba ciljeva 1, 2, i 3 iz aneksa Regulative EIDHR-a 2014-2020. i bit će usmjeren na lokalno civilno društvo.

Pod ciljem broj 1, podržat će se ljudska prava i organizacije koje se bore za ljudska prava tamo gdje su najviše izloženi riziku. Pod ciljem broj 2 se podržavaju ostali prioriteti EU iz oblasti ljudskih prava, a pod ciljem broj 3 se podržava demokratija.

### **FINANSIJSKA SREDSTVA**

Sveukupna indikativna suma dostupna pod ovim javnim pozivom je 1.800.000 eura. Ugovarač zadržava pravo da ne dodijeli sva dostupna sredstva. Bilo koji zahtjev za grantom podnesen u okviru ovog poziva se mora kretati između minimalnog i maksimalnog iznosa:

- minimalni iznos: 150.000 eura;
- maksimalni iznos: 350.000 eura.

**SEKTORI ILI TEME**

- razvoj zajedničkih agendi za ljudska prava i demokratsku reformu;
- izgradnja konsenzusa o osporavanim ili kontroverznim politikama;
- unapređenje političkog predstavljanja i učešća;
- unapređenje inkluzivnosti i pluralizma civilnog društva;
- povećanje sigurnosnih struktura za branioce ljudskih prava i demokratske aktiviste;
- borba protiv zabrinjavajućih trendova smanjenja prostora za civilno društvo;
- podrška aktivnostima koje promovišu pitanja iz smjernica EU o ljudskim pravima i pitanja obuhvaćena Strateškim okvirom i akcionim planom EU o ljudskim pravima i demokratiji;
- jačanje borbe protiv torture, lošeg tretmana, nasilnih nestanaka i van-sudskih pogubljenja;
- jačanje vladavine prava i dobrog upravljanja.

**LOKACIJE**

Aktivnosti se moraju provoditi u Bosni i Hercegovini.

**TRAJANJE**

Inicijalno planirano trajanje bilo koje aktivnosti ne smije biti kraće od 18 mjeseci niti duže od 36 mjeseci.

**KAKO SE PRIJAVITI**

- Prijava se sastoji iz dvije faze: koncepta i kompletne prijave.
- U prvom stepenu, na ocjenjivanje se mogu podnijeti samo koncepti prijedloga. Nakon toga će vodeći aplikanti koji prođu prvi krug selekcije biti pozvani da podnesu kompletnu prijavu.

**ROK ZA PRIJAVU**

Rok za podnošenje prijedloga projekata je **10. maj 2016. godine u 17:00.**

Više informacija na : <http://europa.ba/?p=41430>

**4. Форум театар расписује КО НК УРС**

Књижевна манифестација 15. међународни фестивал поезије за дјецу и младе „Пјесмарица Петру Кочићу“ 13 - 16. 12. 2016. године - Источно Сарајево

1. Конкурс на тему „Идеш ли роде“ епilog из приповијетке „Међава“ Петра Кочића. Услови учешћа: на конкурс могу да учествују ученици основних, средњих школа и чланови књижевних клубова. Три пјесме сваког аутора са именом и презименом, називом школе, контакт телефоном и електронском адресом.

Радови се шаљу електронском поштом на емаил: [lut.fest@teol.net](mailto:lut.fest@teol.net)

НАЈБОЉЕ ПЈЕСМЕ У ТРИ КАТЕГОРИЈЕ (I категорија, 1-5 разреда, II категорија, 6-9 разреда ОШ и III категорија, средњошколци)

Награђени учесници конкурса учествују у програму манифестације.

2. Конкурсу за младе пјеснике од 18 до 30 година, за најбоље три пјесме је тематски, према приповијети „МРГУДА“ Петра Кочића.

- Аутори су дужни да пошаљу три пјесме на адресу Форум театра.

- Радови се потписују шифром, а рјешење шифре са контакт подацима доставити уз пјесме у посебној, затвореној коверти.

Плакету „ПЈЕСНИЧКО УЗДАРЈЕ РАДОСЛАВНИЦА“ добија најбољи аутор присуствује уручењу на свечаној академији и отвара манифестацију

СВИ НАГРАЂЕНИ РАДОВИ СЕ ОБЈАВЉУЈУ У КЊИЗИ ФЕСТИВАЛСКО ИЗДАЊЕ

**Конкурс траје од 23.04. до 01.10.2016. године**

ФОРУМ ТЕАТАР (Фестивал поезије за дјецу и младе)

Бановић Страхиње 5

71123 Источно Сарајево - Република Српска, БиХ

Контакт телефон: +387 57 317 230

[www.lutfest.com](http://www.lutfest.com)

[lut.fest@teol.net](mailto:lut.fest@teol.net)

## Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

*Rok za dostavljanje informacija za svako naredno izdanje je 30-ti u mjesecu.*

WEB stranica Mreže:  
[www.omladina-bih.net](http://www.omladina-bih.net)

Mejling lista Mreže:  
[posta@omladina-bih.net](mailto:posta@omladina-bih.net)

sCh design

Webmaster:  
Emir Delalić-Zeko - Tuzla  
[emir.delalic@gmail.com](mailto:emir.delalic@gmail.com)

Adrese za slanje vaših informacija za mjesečni bilten:

### Omladinski resursni centar Tuzla

Hadži Bakirbega Tuzlića 1

75000 Tuzla

tel/fax: 035 258 077

e-mail: [orctuzla@bih.net.ba](mailto:orctuzla@bih.net.ba)

hcatuzla

---

*Mjesečni bilten uređuje Omladinski resursni centar - ORC Tuzla*

---